

O Se Pulou Paepae mo Florence

Saunia e Jordan Monson Wright
(E faavae i se tala moni)

O Florence Onyejekwe e sefulutolu-tausaga le matua na taunuu atu i lona nofoaga masani i le maketi e fai i fafo o Onitsha, Nigeria. Sa tumu le auala i tagata fa'atau o vala'au atu i tagata faifaatau pisi. O tamaitai e faapaleni avega i luga o o latou ulu ao latou savavali. Na faatoa tuua le aoga mo le aso malolo, ma na iloa e Florence na fiafia ana uo i le malologa mai vasega. Ae o Florence na fa'aalu ona aso malolo e faatau atu ai lau-laau oona iinei i le maketi. Na o le pau lea o lona avanoa e maua ai se tupe mo lona pili aoga.

Ae le i faitio Florence. Aua, na fa'aaluina e lona tina le tele o itula i le maketi i aso uma e fa'atau atu ai ufi e fa'atau ai meaai mo le aiga. Na galue malosi Tina. Na galulue malosi uma ona matua. Ae e aunoa ma se aoaoga



tele, e na o le pau lea o mea e mafai ona latou faia. Na toeitiiti lava uma le aoga maua-lalo a Florence. Masalo pe afai e mafai ona ia fa'aauu ana a'oga, e mafai ona ia maua se galuega e totogi lelei ma fesoasoani i lona aiga.

Ina ua foi o ia i le fale, sa maua e Florence ona matua ma fesili, "E te lua manatu e mafai ona ou alu i le aoga tulagalua? Ma masalo le iunivesite?"

Sa autilo atu Tina ia Nnam (tama) ma lulu lona ulu. "E sili atu le tau o le Iunivesite nai lo le tupe ua tatou maua," o le tala lea a Nnam. Sa autilo ifo Florence i lalo i ona seevae. Sa le manao o ia e iloa e Tina ma Nnam lona le fiafia.

I ni nai aso mulimuli ane, sa alu ai Florence i le falemai e piki ni vai laau. O le falemai na pisi tele e pei o le maketi, ae e le pisapisao pei o le maketi. Sa sioa atu Florence i tausima'i ma o latou pulou malo, papae. Sa ia vaai faalemafaufau o ia ofuina se toniga faapena, fesoasoani i e mamai ma le tausia o pepe i se falemai tele. Atonu e mafai ona ia avea ma tausima'i.

Na iloa e Florence e sa'o ona matua—o le mauaina o le poto o le a faigata. Ae sa iloa e Florence galue malosi. Sa ia filifili ai e taumafai.

Po o le a lava le tele o feau e faatumulia ai lona aso, sa faaavanoaina lava e Florence le taimi e

suesue ai. Na pasi ana suega mo le aoga tulagalua, ma na lava ma totoe le tupe na aitalafu e Nnam e alu ai i le aoga. Mulimuli ane sa ia iloaina o le a fesoasoani le malo e totogi le aoga tausimai. Sa latalata mai lana miti!

Ae ina ua oo i le taimi e amata ai le aoga tausimai, na lagona ai e Florence sina masalosalo. Ae a pe afai e faigata tele? Ae a pe afai na tuuatoatasi o ia? Sa punou Florence ma tatalo, "Le Atua pele, faamolemole tuu mai ia te au le malosi ou te alu ai i le aoga tausimai ma galue malosi."

I le a'oga tausima'i, na a'oa'o ai e Florence le auala e tu'uina atu ai vai la'au ma faamama meafaigaluega mai siama. O nisi taimi na toe malolosi ana ma'i, ae o nisi taimi latou te le'i toe foi i se lelei. Sa masani ona tatalo Florence mo le lototele. Ina ua mavae tausaga uumi e tolu, na faauu Florence ma le faailoga mo le tagata aoga pito sili ona lelei i lana vasega. Sa taunuu lana miti! Sa mafai ona ia tuiina le pulou paepae tausima'i, ma sa mafai ona ia maua se tupe e fesoasoani ai i lona aiga.

I le tele o tausaga mulimuli ane, na asi ai Florence i se paranesi laitiiti i le Misiona a Ghana Accra. O lona toalua, o Christopher Chukwurah, sa avea ma peresitene



ATA NA TUSIAE ARTHUR LIN



o le misiona iina. Sa feiloai Florence ma tamaiti i le paranesi e le mafai ona o i le aoga i taimi uma. Sa latou le mautinoa po o le a le mea e fai i o latou lumana'i. Sa latou faamanatu atu ia Florence ia lava a o laitiiti. "O le a se mea e mafai ona ou ta'u atu e fesoasoani ai ia i latou?" Sa tatalo filemu ai Florence.

Ona ia lagona lea o se musumusuga manino: Faamatala i ai e uiga i lou olaga.

Sa mafaufau Florence i lona ia lava olaga. Sa ia faigaluega i falemai i Nigeria ma le Iunaite Setete. Na ia faaiipoipo atu i se tamaloa lelei, ma na la mauaina faatasi Le Ekalesia a Iesu Keriso o le Au Paia o Aso e Gata Ai. Na avea o ia ma se tina. O lenei ua ia fesoasoani i faifeautalai ia maua le soifua maloloina ma galulue malosi. Na fesoasoani le Tama Faalelagi ia te ia e avea ma se tausima'i. Sa fesoasoani o Ia ia te ia e faia le tele o mea nai lo mea na ia mafaufauina. E mafai ona Ia faia foi mo nei tamaiti.

Sa tilotilo atu Florence i tamaiti ma ataata. "Tou te iloa pulou papae la e ofuina e tausima'i? Na ou vaaia se pulou faapena ma ou filifili ai loa e avea ma se tausima'i . . ." ●
E alala le tusitala i Michigan, ISA.

O le ata lenei o lo'o fa'aalia ai Florence ina ua i'u ina maua lona pulou pa'epa'e!

